

Despues di a reuni cu e team di infraestructura

Proyecto di Centro di Ciudad pa tanto Playa como San Nicolas ta continua

ORANJESTAD – Den e ultimo dianan aki Formado Sr. Mike Eman a reuni cu varios gremio pa loke ta trata inventarisacion di proyecto. E biha aki a reuni cu e team di Bo Aruba (Infrateam), kendenan ta na encargo pa conduci varios proyecto di renobacion y construccion pa embeyece-mento di tanto nos Centro di Ciudad como tambe e revitali-sacion di San Nicolas.

PARTINAN CU FALTA

E final di caya grandi ta un di e partinan cu falta pa loke ta e completacion di embeyece-mento di Caya Grandi. Segun formado Eman, fuera di esey tin e oficina di locual ta wordo yama BID, cu ta e oficina di e asociacion cu ta bay maneha Caya Grandi, den cual a aproba den Ministerraad. Tin un organo, mescos cu tin ATA, Private Public, den cual tin representantenan di gobierno

y representantenan di esnan cu ta stakeholdersnan den Centro di Ciudad. Nan ta bay forma parti di e asociacion aki. E asociacion lo bay tin algun responsabilidad basta importante. Uno ta di maneha henter e centro di ciudad, percura pa e mercadeo di e centro di ciudad, percura pa e trabaonan di mantencion di tur locual a wordo construi y renoba wordo haci cu continuamente Caya Grandi y vecindario ta limpi y atractivo y nan ta bay percura tambe pa e seguridad den e area aki caminda cu lo bay tin un serie di precaucion cu lo bay wordo tuma pa haci henter e area den centro hopi mas sigur. E oficina ta ubica den parti di unda tabata e edificio di Nikki Habibe, cu gobierno a cumpra. Parti di e edificio a wordo elimina pa por haci e lorada pa e tram y un parti a wordo conserva cu lo

bira e oficina di e asociacion. Esey ta un proyecto cu na e momentonan aki ta bay inicia.

DEMÁS PROYECTONAN DI CENTRO

Tin e edificio di Zoutmanstraat cu ta den restauracion na e momentonan aki, Eman a splica. Tin e havenkantoor cu ta den restauracion na e momentonan aki, e oficina di cocolishi cu ta biniendo cla. Awor ta bay cuminsa cu e plaza cu ta pega na e edificio aki. E plaza ey a wordo diseña y awor ta bay wordo poni pa destaho publico pa henter e “binnehof idee” haya su forma. Tambe lo bay haya e bestuurskantoor restaura y mas trabao lo mester bay wordo haci den futuro. El a sigui splica cu henter e area lo bay wordo embeyece. Gobernador mes a haci un trabao importante na su oficina. Hunto cu e plaza cu lo bay bin, lo bay

haya cu henter e blok ey a bira uno sumamente atractivo, interesante tambe pa turistanan bishita ora cu e edificio den Zoutmanstraat lo bira caminda artesanía local original ta bay wordo bendi.

SAN NICOLAS Y SCOLNAN NOBO

Tin e proyectonan di revitalisacion den centro di ciudad San Nicolas, Joe Laveist Ball Park, Lago Heights Hill Park, Pastoor Hendrikstraat, Carnaval Museum y Carnaval Village, Eman a agrega. Tin e proyectonan di renobacion di scolnan y proyecto di construccion di scolnan nobo. MAVO, HAVO, VWO na Noord ta un di e proyectonan cu lo bay wordo desaroya.

800 CAS DEN 4 AÑA

Segun formado Eman, tin 36 proyecto ainda di renobacion di barionan. Di parti di FCCA lo bay construi den e siguiente

4 añanan, segun nan programa 200 cas pa aña cu ta bay ta 800 den e 4 añanan aki. Banda di esey lo bay duna hipoteca cu ta pa 1600 cas den e siguiente añanan. Gobierno mes tin tambe un proyecto di verka-veling di 2000 tereno pa duna pa traha cas. Ta spera cu den e siguiente 4 añanan por bay tin construccion di mas of menos 4000 cas. Esey sin duda lo bay yuda un lista di interes cu tin di 1700 cas na FCCA, segun Eman. Sigur for di esnan cu no ta acudi na FCCA, pero tambe cu tin interes pa haya tereno of pa cumpra cas, e proyecto di traha cas aki lo bay haya un empuhe hopi grandi y ta bay cumpli cu e necesidad importante cu tin den comunidad pa vivienda. Na e mesun momento tambe un bialha mas construccion cu ta yuda e economia di pais Aruba, Eman a termina bisando. □